

*Propositio 1872*  
*De*

# Conventu Sagarum in monte Brueterorum, nocte ante Calendas Maji,

*Disputatio,*

*Quam,*

*Divinâ favente gratiâ,*

*In Illustri Academia Witebergensi,*

**PRÆSIDE**

*Præ-Eximio atque Clarissimo*

**DNO. M. JOHANNÉ Müllern /**

**Sereniss. SAXON. ELECTORIS Alumno,**

*Fautore atque Amico suo plurimum colendo,*

*publicæ ventilationi,*

*ad ipsas Maji Calendas,*

*Anni M. DC. LXXV.*

*locò consuetò*

*horis antemeridianis*

*exponit*

**ADAMUS NICOLAUS BERSMANNUS,**

*Grimmâ Misnicus,*

*A. & R.*

\*\*\*\*\*

**WITTEBERGÆ,**

**EX TYPOTHETEO HAKIANO.**

*A:5090.*



7440 B 460

VIRIS

*Amplissimis, Prudentissimis & Specta-  
tissimis,*


DOMINIS CONSULIBUS  
AC UNIVERSO ORDINI  
SENATORIO

Inclytæ Reipublicæ Grim-  
menfis,

*Dominis Patronis ac Promotoribus suis  
Honoratissimis*

Primitias hæc ex fructibus studiorum Academicorum,  
testandæ observantiæ suæ causâ  
offert

*Autor & Respondens.*



## Cum DEO!

§. 1.



### Nstant iterum *Calendæ*

*Maji*, quas , post Divum Philip-  
pum & Jacobum , Christi Aposto-  
stolos , Beatæ *Walpurgi* virgini an-  
tiquitas consecravit. Noctem, quæ  
ferias has antecedit, rumor aliquis  
ærate admodum gravis famosam ac  
portentosam fecit. *Ajunt enim in*  
*ea, solennibus à Diabolo comitiis in-*  
*dictis, universas totius Germania Sa-*  
*gas convenire, suorum Principi de novo*

*Sacramentum dicere.* Videas eâ de causâ, inclinante die  
& vesperâ de cœlo præcipitante, famellas , imprimis rusticas,  
ut superstitionibus deditum est ingenium vulgi, varias her-  
bas & frondes, in his sambucum maximè, conquirere , atque  
istas mensis, lectis, fenestris, stabulis & nescio quibus aliis lo-  
cis adfigere. Ita enim incantationes veneficarum prætervo-  
lantium ( ô sancta simplicitas ! ) averruncari, sibi persuadent.  
Digna res propter jucunditatem suam visa est , quæ peculiari  
Dissertatione à nobis expediretur. Cui operi ut clementer  
annuat Numen divinum, supplici illud prece veneramur.

§. 2.

Antè verò, quàm, quid de illo conventu nobis videatur,  
exponamus, operæ pretium erit , brevem omnium circum-  
stantiarum ejus, ut vulgò adferuntur, historiam texere. Rem  
igitur ita contingere narrant : Postquam Lamia aliqua Di-  
abolo homagium præstitit, statim Dæmon unus ad infervien-



dum ipsi à Principe Dæmonum constituitur ; quem quidem illa ad mollitiem & blanditiā aptō vocabulō *Magisterulum* & *Martinulum* suum salutat. Hic Strigem non tantū ad conventus, quotiescunque opus est , (conveniunt enim & aliās sæpius, quamvis is, qui nocte ante Maji Calendas instituitur conventus præ aliis solennis sit , ) *impellit* & *convocat* , ita ut sine fontica causa refraganti pœnas etiam irroget , sed & verè transportat. Ante deportationem autem *varie figure* , *circuli* & *inclinationes* à saga fiunt , *unctio* etiam & *verba* adhibentur. Uctionem quod attinet , habet in pyxide unguentum aliquod, ex variis insulissimisque rebus confectum, maximè verò ex ungvine infantuli necati. Hoc inungit baculum aut scopas, quibus, ut mox audiemus, devehitur. Aliquando tamen non baculum, sed vel crura, vel alias sui corporis partes illinit. Posset quidem sine ungveto sagas transferre Diabolus, & quandoque id facit. Sed unguentum tamen ut copiosissimè adhibeatur, autor iis est, quò quamplurimos infantes perimant. Indicio est, quòd dicit, primā vice sufficere unguentum commodatò acceptum, postea necessum esse, ut ipsæmet illud sibi ex infanticidio præparent. *Conf. de his omnib9 Mart. Delrig, prius Hispaniarū Regis Philippi II. Consiliarius & supremus Judex Belgici Exercitus, deinde Jesuita ac in Lovaniensi, Græcensi, Salmaticensi Academiis Professor, Disquisit. Magicar. libr. 2. quæst. 16. itemque Simon Majolus Dier. Canicular. Tom. II. Colloqu. 3. pag. 629. seqq.* Quæ verba maleficæ dicunt: **Oben aus/ und nirgend an.** Hòc votò præmissò tolluntur in altum ac deportantur. *Vid. Dn. D. König Professor quondam Altdorffinus in Heptad. Cas. Conscient. Miscell. cas. 2. p. 40.*

### S. 3.

Res, quam Diabolus in transvectione instrumenti locò adhibet, interdum est figura *hirci*, *tauri*, aut *alterius animalis* (scilicet non veri, sed phantastici,) interdum *arundo*, *colus*, *scopæ*, *furca* aut aliud quippiam à Diabolo sublevatum.

Exem-



Exempla in istis omnibus, quæ dixi, transportatarum collegit *Nicolaus Remigius, Ducis olim Lotharingæ Consiliarius lib. 1. Demonol. c 14.*

§. 4.

Terminus, ad quem devehuntur, est *Bructera*, mons sylvæ Hercyniæ altissimus, in territorio Brunsvicensi situs, cui olim *Meliboco* fuisse nomen legimus. Descriptionem ejus in peculiari tractatu Germanico *Dn. M. Johannes Prætorius* dedit. Frequentare autem hunc quæ in Germania sunt Saggæ, nocte, ut suprâ indicatum, ante Walpurgis festum (aliis enim temporibus alibi convenire possunt,) dicuntur. In aliis gentibus alia loca hæc ex re clara.

§. 5.

Quando jam ad *ludum bonæ societatis* (ita Itali hos conventus appellant,) striges delatæ sunt, ignis plerumque accensus est teter & horridus. Ibi Dæmon conventûs præses in folio sedet, formâ terrificâ, ut plurimum hirci aut canis. Ad illum accedunt adorandi gratiâ, non eodem modo omnes & semper, sed interdum complicatis genibus supplices, interdum obversô tergô stantes, interdum cruribus etiam in altum jactis, nec capite in anteriorem partem pronô, sed resupinatô, adeò ut mentum ad cælum feratur. Tum candelis piceis oblatis, vel umbilico infantuli ad signum homagii eum in podice osculantur. Interdum liberos suos Diabolo offerunt & occidunt; interdum hostiam sacram post communicationem ore adservatam & extractam coram Dæmone pedibus conculeant. His & similibus ritibus ac flagitiis præmissis, incipiunt mensis adsidere, & convivari de cibis, quos Dæmon suppeditat, vel quos singulæ attulerunt. Solent diversæ mensæ esse, cibis interdum delicatissimis, interdum valdè insipidis & insulsis onustæ. Aliquando suus cuique Dæmon assidet, aliquando maleficæ unâ ex parte, & suus cuique Dæmon ex adverso. Nec mensæ sua deest benedictio, & actio gratiarum, verbis constans planè blasphemis, quibus

bus ipsum Beelzebub creatorem, datorem & conservatorem omnium profitentur. Convivio interfunt facie interdum velatâ larvâ, linteo, vel alio velamine; interdum apertâ. Post convivium choreas ducunt, dum quisque Dæmon suam, quam custodit, discipulam manu prehendit; & quidem dorsis invicem obversis, & in orbem junctis manibus, jactantes capita more fanaticorum; nonnunquam candelas ardentes manu tenentes, quibuscum antea Dæmonem osculantes adorârunt, & cantantes fescenninos in honorem Dæmonis obscœnissimos; vel ad tympanum fistulamve sedentis alicujus in arbore bifida saltant, omniaque ridiculè, & contra caterorum morem peragunt. Tum suis amasiis Dæmonibus foedissimè miscentur. Denique sua unaquæque narrat ab ultimo conventu facinora, quæ quò gravivora, eò collaudantur uberius: si nulla, vel non satis atrocia, verberantur à Dæmone. Ultimò pulveribus vel venenis aliis donantur, sæpè etiam indicto cuiquam nocendi pensò, & pronuntiatio Pseudothei Dæmonis decreto: *Ulciscimini vos, alioquin moriemini*, suas quæque domos, si propè sint, pedibus; sint distantiores, ut advectæ, repetunt. Solent & sacrificia quandoque fieri Dæmoni in conventibus, eaquæ statim initiò peractâ adoratione. Conf. *Schottum Physic. Curiosa lib. 1. c. 23. §. 6. p. 102. seqq.* ex quo hæc, summa brevitate ex aliis multis collecta, desumimus.

#### §. 6.

De hoc jam conventu ejusque ritibus (imo & conventiculis Sagarum in locis aliis) & eum antecedente transvectione, verè contingant, an minus? per multa jam secula doctiores contentiones ferram inter se recipiârunt. Adfirmârunt multi, dicentes, *Lamias verè, ope Dæmonis, ad commensationes, tripudia & id genus alia celebranda transportari.* Sed nec pauci etiam, vice versâ, qui id negarent, inventi sunt, *pro meris Satanae prestigiis & illusionibus isthac, quæ jam dixi, habentes.* Autores in utramque partem adduxere *Delrinus loc. citat. Gisbertus Voëtius Dissp. Theologicar. selectar. part.*



part. 1 p. 948. Caspar Schottus loco alleg. § 1. & 2. p. 90. & 91. B. Benedict. Carpzov. in Pract. Criminal part. 1 qu. 48. n. 22. & 57.

§. 7.

Non verò adeò in quaestionem venit, an solæ animæ sagarum, relictis domi corporibus ipsarum, transferantur & conventibus intersint? Adserere quidem id ausus est *Johannes Bodinus* Gallus, qui, prout variis rebus applicare ingenium solebat, librum *de Demonomania* Gallicè conscripsit, qui deinde Latinè etiam ac Germanicè editus est. Verùm eâ sententiâ universis, qui æquâ mentis lance rem ponderant, Theologis juxtâ ac Philosophis bilem movit. Neque id immeritò; cum animarum illa extra corpora abreptio, & cum iisdem redunitio toti naturæ repugnet, & mortuorum veram resurrectionem inferat; quæ soli tamen Deo propria, & à Diabolo finito spiritu prorsus aliena est. *Conf. B. Jac. Martini in dissertat. de Magic. actionibus edit. Witteb. anno 1623. it. B. Sperling. in Synops. Phys. p. 85.* Si tamen tale quid accidisse sibi Lamiæ confiteantur, id corrupto illarum judicio atque depravatæ phantasiæ tribuendum duxerimus. Cæterùm suis se refutant verbis. Etenim commensationibus indulgere, & tripudia exercere quâ ratione anima ab omni prorsus materia separata valeat? *Vid. B. Sperling. Institutt. Phys. p. 379.*

§. 8.

Quæstio igitur remanet de toto, ut Philosophorum filii loquuntur, supposito Sagarum, corpore simul & anima constante, quod verè transvehi & conventui nefario interesse, sententia, ut *Delrius* inquit, est communior Theologorū, imo & Jurisconsultorum Practicorum Italiæ, Hispaniæ & Germaniæ, tenent etiam scribentes plurimi: *nos autem cum aliis nonnullis, rationibus adducti gravissimis, negamus.*

§. 9.

Equidem posse Dæmonem corpora de loco in locum motu ce-

tu celerrimo vehere, non est quod ambigamus. Tanta enim est spirituum potentia, ut iis corporalia omnia quoad motum localem obediant; tanta agilitas naturæ Angelicæ, ut celerimè rem motam impellere possit. Ut verò huic adsertioni non rationes, ita nec rationibus exempla defunt. Angelus quidam Habacucum, capite apprehensum è Judæa Babylonem transferens, & statim inde referens, brevi temporis spatio immensa spatia locorum confecit, *Dan. XIV, 35. 38.* Alius Philippum Hierosolymis Gazam iter facientem, transportavit Azotum. *Actor. VIII, 26. 39. 40.* Nec juvat *Ulricum Molitorem*, quod dicat *lib. 8. de Pytho. Mulierib.* malè nos ab Angelis bonis ad malos argumentari. Eadem enim malorum Angelorum quæ bonorum potentia est; cum in illis per lapsum ea tantummodo, quæ gratiæ erant, perierint, remanentibus naturæ dotib9, quamvis non nihil ligatis & obfuscatis.

§. 10.

Quare etiam documenta verè à Diabolo delatorum & corporaliter deportatorum expedire habemus. Annon Christum Servatorem è deserto super pinnaculum Templi, & ex hoc in verticem montis valdè excelsi Cacodæmon transferre pro impudentia sua ausus est? *Matth. IV. 5. 8.* Novi equidem aliquos, in quibus est *Alciatus lib. 8. parerg. c. 22. & ex eo Philippus Camerarius Horar. subcissuar. centur. 1. c. 72.* veritatem hujus transvectionis negare; verùm hi textui sacro manifestam vim inferunt. Videantur hac de re agentes Theologi, & conf. *Dn. Doct. König loc. citat.* Sed videamus & alia. Simon Magus Samaritanus (qui sub Claudio Cæsare statuâ donatus est, cum hac inscriptione: *Simoni Mago Deo, vel Simoni sancto Deo,*) peraërem remigiò alarum Dæmoniacarum vectus vagari potuit. Tandè verò ad preces Divi Pauli, vel, ut alii referunt, Petri retractus, in terrâ decidit, vitâq; finivit; quæ res Apostolo mortè attulit. *Vid. Egesipp9 lib. 3. Excid. Hierosol. c. 2.* Et non semel compertum est, Dæmonem conjuratos suos in altissimas auras cū gemitu & ejulatu abripuisse.

§. 11. Utut



Utut verò hæc ita sint , compertum tamen non semel fuit, Sagas de transvectionibus , conventibus & tripudiis Dæmoniis splendidissimè nugatas fuisse, cùm domi in suis cubiculis aut alibi jacuere , somno profundo obrutæ. Ex quò clarum evadit , ista verè nequaquam contingere ; sed ad lusus & præstigias meras Diaboli referenda esse. Tria saltem, ( quoniam res plura non patitur , & trinum aliàs perfectum censetur,) exempla in medium adferam. *B. Lutherus* , postquam docuisset, transvectiones istas per aërem mera esse somnia Diabolica, *Tom. I. Jenens. fol. 126.* hoc exemplum ex *Johanne Keyfersbergio* Concionatore olim Argentinensi adfert : Vetula , ut prædicatorem argueret mendacii, qui transvectiones ejusmodi docuerat esse falsas , serò eam vocavit , & adspectante illo se inunxit, sedensque in furca ac jam volens devehì, statim obdormivit, & quibusdam gestibus hinc inde se movit, donec de scamno caderet , & vulnus in caput acciperet. Tandem igitur reversa ad se, convicta est de illusionè ex vulnere & casu , quamvis vidisse se jactasset mirabilia. Geminum huic est, quòd narrat *Simon Majolus* loco superiùs allegato : Vetula quædam Burdegalensis Maga apud judices confessa est, se cum aliis per hebdomadas singulas fuisse exportatam, ubi magnus hircus adoratur , quo autore abnegabant Deum , se Diabolo servituras spondebant, singuli pudenda illius osculabantur , & post saltationes pulveres accipiebat quæque. Tum *D. Belottus* libellorum supplicum Magister, dicente Maga, se nihil posse, nisi è carcere educta esset, volens rei veritatem explorare, eam educi jussit : & illa cùm senudam certo adipe inunxisset , velut mortua expersque sensus corruit, deinde post horas quinque ad se reversa exsurgens permulta narravit, quæ variis in locis ita habere, ut dixerat, comperta sunt. Huc quoque pertinet, quòd refert *Paullus Grillandus Jurisconsultus Italianus in tractat. de Sortileg. quæst. 7. num. 6.* adducente *B. Carpzovio in Practicis Criminali-*

*nalibus* : Quidam maritus ex oppido agri Sabinensis habebat uxorem maleficam sive strigem, ut vulgò vocant: de crimine autem erat saltem suspicio, non certa notitia. Hæc cum aliquoties à marito rogaretur, num ejus esset professionis, negabat constanter; crescente porrò rumore, & viris fide dignis apud maritum ejus flagitii uxorem insimulantibus, quòd ea familiariter uteretur aliis mulieribus, hujus criminis ratione cognitis, cum quibus etiam se turpibus miscere sceleribus, & nocturnos agere cœtus videbatur, decrevit maritus ipsam in ejusmodi operibus observare & deprehendere, cœpitq; pluribus noctibus diligenter & attentè vigilare, noctesque circiter duodecim egerat insomnes, attendens studiosè, num illa ad Dæmonum lusum, vel aliud maleficium evagaretur, & cum penes se in lecto remaneret noctè totà, quando semel lectum conscendisset, nihil unquam fraudis comperit, sed manibus illam semper in lecto contrectavit. Cum verò post dies paucos, unà cum quibusdam aliis de eodem crimine accusatis in carcerem conjiceretur subdereturque quæstionibus, confessa est demum, se tali interfuisse lusui unà cum aliis mulierculis incarceratis flagitiique hujus reis, denominatò certo tempore die atque hora. Maritus verò adserebat, præstitò juramentò gravissimò, eam illa nocte, & maximè illa hora secum decubuisse in eodem lectò, & se eū tum non semel tantum studiosè tetigisse, sed pluries. Plura si quis sitiat exempla, ex *Olai Magni*, *Tostati Majoli*, *Carpzovii*, *Grillandi* aliorumque fontibus ea haurire poterit.

§. 12.

Potest enim Diabolus, ut est veterator nequam, & mille technarum artifex, ita illudere mancipia sua, ut sensibus internis externisque vinctis & consopitis, phantasià etiam læsà & turbatà credant se audire, videre & facere quæ nunquam tamen contingunt. Quas species Melancholicorum cogitationes non fingunt? In somniis etiam & nocturnis visionibus sæpe extra nos ipsos rapimur, & multa dormiendo in  
spiri-



spiritu tantummodò videmus, quæ tamen in corpore accidere putamus. Cur Satanas, cum mentem cujuscunque mulierulæ cepit, & hanc per infidelitatem sibi subjugavit, non in diversarum rerum species ac similitudines se transformare, atque menti in somniis modò cognitæ, modò incognitæ personas ostendere, convivia, choreas & omne voluptatû gen9 proponere, & eâ in devia quæq; deducere nequeat, ita ut dum solus Spiritus hoc patitur, infidelis tamen mens non in animo sed in corpore ista evenire opinetur? Ita scilicet maleferiat9 ille miseros homines inescare & fictâ voluptate, non secus ac hamo pisces capiuntur, allicere, allectos verò in nassa suâ retinere novit.

§. 13.

Deprehendas id in *Lycanthropis* & *Galeanthropis*. Pervadent sibi ejusmodi homines, mutatos se in lupos, feles aut alia animalia esse. Pervagari se campos, dilaniare pecora, aliosque luporum aut cæterorum brutorum animantium actus exercere, nescio quâ ficulnea credunt fiducia. Imprimis in *Borussia*, *Livonia* & vicinis regionibus tale quid accidere hominibus, fama est. Vid. *Pencernus de Divinat. p. 160*. Sed nec naturæ, nec Satana hæc animalium productio & immutatio possibilis est. Unde & ii, qui se in lupos credunt transformatos, altò immerfi somno, Diaboli ope, alicubi reperiuntur. Vid. *Camerar. Horar. subeissiar. cent. 1. p. 328*. Exemplum valde manifestum adducit *Dn. Michael Mei in disp. de λυκανθρωπία*, quod sibi à magno quodam Viro in Livonia teste ejus rei oculari relatum dicit. Inventus enim est talis Lycanthropus, & à magna hominum frequentia lustratus. Jacebat immotè stertens velut truncus, & cum excitari non posset, fustibus probè, sine omni tamen doloris sensu, dedolabatur; vulnus etiam aliquod leve faciei infligebatur. Tandem expergefactus miros vagationis suæ ludos exponebat, tot camporum peragrationes, tot pecorum dilanationes, tot iidem gregum dissipationes jactabat. Cum autem rogaretur,

tur, undenam cicatrice faciẽm fãdasset ? canis morsum ar-  
menta gregesque à Luporum irruptionibus defendentis esse  
ferebat. Cũ rogando instarent, quĩ totum quasi tuber esset  
corpus ? pedi Pastoris notas esse ferebat, quò se lupum verbe-  
ribus à pecoribus abegisset. Vid. plura exempla ap. *Peucer.*  
loc. citat. & *Bersmannum in Annot. super Metamorph. Ovi-*  
*dii fab. 2.* Quid ergò hic dicendum ? Lusus Satanæ est, qui  
ἐκείνου corripit homines, & phantasmata varia suggerit.

§. 14.

Quòd verò eandem technam adhibeat in fictis illis de-  
portationibus & conventibus Sagarum, vel ipsa Sagarũ con-  
fessio edocet. Dicunt enim se, quando causa aliqua est, cur  
realiter deportari nolint, (ut quando verentur, ne detegan-  
tur,) tamen, quicquid in conventu peragitur, ope Diaboli  
videre posse. Modum hujus rei manifestat *Jacobus Sprenge-*  
*rus in malleo maleficarum Tom. 1. part. 2. quæst. 1. p. 260:* Si,  
inquiens, aliquo casu nolunt transferri, scire tamen volunt  
omnia, quæ in concione illa ab earum consodalibus agan-  
tur, tunc talis ab iis servatur modus, ut in nomine omnium  
Diabolorum se reponant cubitum in-latus sinistrum. Tunc  
quasi vapor quidam glaucus ex eorum ore procedit, in quo  
tanquam in speculo singula quæ aguntur in conventiculis  
conspiciunt. An verò Diabolus, quod semel potest, altera  
vice nequeat ?

§. 15.

Sed excipere solet pars adversa, se concedere, quòd in-  
terdum Diabolus phantasmate Sagas ludat, id verò non sem-  
per contingere. Distinctionem ergò aliquam cudendam di-  
cunt inter *actum verum & phantasticum.* Hunc admitti  
quidem debere, sed illum propterea non planè negari. Sed  
quodnam distinctionis suæ fundamentum habent ? Scilicet  
ipsam Sagarum adsertionem, qui se interdum imaginariè, in-  
terdum



terdum verè transportatas esse & conventibus interfuisse garriunt. Eas autem & tunc, quando verè se putant transvectas, imaginibus ludi, exempla superiùs allata evincunt.

§. 16.

Adhiberemus plures ad dejiciendos muros partis contrariæ arietes, nisi Leges *Amplissimæ Facultatis Philosophicæ*, plures pagellas non permittentes receptui canere inciperent. Paucis tamen, dum licet, vires periclitabimur. Enimverò omnia, quæ de transvectionum istarum & conventuum causis atque circumstantiis dicuntur, plena sunt ineptiis atque repugnantiiis. Ad efficiendam deportationem Sagæ adhibent characteres, inclinationes, figuras, circulos, verba. At ut quantitatis, ita & eorum, quæ quantitatem sapiunt, cujus generis sunt omnia isthæc, quæ memoravi, nulla est efficacia. Horis paucis nocturnis in Bructera esse dicuntur. At in his non tantum transvehi, & redire, sed & adorare Diabolum, homagium ei præstare, illi sacrificare, tum convivari, choreas ducere, cum amasiis suis concumbere, & tandem narrare singulas tantò numerò congregatas omnia sua ab ultimo conventu facinora, an verò videatur simile? Mitto alia, de *unguento*, quò utuntur, de *loco*, in quo conveniunt, de *ceremoniis*, quas in conventu adhibent, atque hîc, Deo pro concessis viribus gratias exsolvens, desino.





**B**ERSMANNE, publicè probas indu-  
striam,

Et quam Tibi eruditionem plurimò  
Labore comparâsti. Ut hic laudem meret,  
Sic nec suis carebit illa præmiis.

Quæ quò Tibi sint fausta, comprecor.  
**DEUM.**

*Præstantissimo Dno. Respond.  
ex animo gratulans fac.*

*Balthasar Stolberg / Prof. Publ.  
& Colleg. Philos. h. t.  
Decanus.*



**H**Oc munus est fortis bonique mili-  
tis,

Ut pugnet antè strenuè, quàm lau-  
ream

Sibi

Sibi adferat. Sic Palladi qui nomina  
Dedit, coronas, indices victoriæ,  
Post erudita consequatur prælia.  
Quare quis illas jure deneget Tibi ,  
BERSMANNE , cui non pugna fortis  
displicet ?

Constantinus Ziegler/  
D. P. P.



Ob wohl die Heren-Zunft niemahls den  
Berg besteiget/  
Wo der berühmte Hark mit seiner Pracht sich  
zeigt /  
Weil Ihr der Teuffel nur bethöret Ihren  
Sinn:  
So schwingest du Dich doch auff Pindus  
Spitzen hin/  
Wo eine beßre Zunft der Musen ist zu fin-  
den /  
Die jekund einen Kranz zu deinen Ehren  
winden :

Darumb



Darumb wie Brockers · Berg eröffnet  
deine Kunst /  
So lohnt Dir Pindus- Berg mit unge-  
meiner Gunst.

Dem Herrn Respondenten als seinem  
werthen Freunde schrieb

dieſes

M. Johann Müller/  
*Præſes.*



**A** Ufugere nives , campus nunc gramine vernat ,  
Arbor & umbrosas explicat alma comas.  
Brumæ qui fuerant enecti tempore flores ,  
Incipit in vitam ver revocare ſuam.

Sic Tua , quæ latuit , virtus quaſi mortua , *Amice,*  
Convaleſcat vires , accipit atque animam ,  
Et quaſi parturiens naturæ trudit in arvis  
Ingenii violas , quas fovet alma parens.  
Gratulor hunc foetum , qui nunc ſe tollit in auras  
Aonias , aderit preſſis opima Tibi !

*Felicioris ominis ergo  
fecit*

M. Chriſtianus Hermannus ,  
Mittweidâ - Miſnicus.



